

UKA 2017/125

16-08-2017

Inatsisartut suleriaasiat § 33 naapertorlugu aalajangiiffigisassatut siunnersuut imaattoq matumuuna saqqummiuppa:

**Siunnersuut uunga: Kalaallit Nunatta pigisaannik sillimmasiisarfimmik pilersitsinerup iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piunasaqaatitariumaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut.**

(inatsisartunut ilaasortaq, Anthon Frederiksen, Partii Naleraq).

### **Tungavilersuut:**

Ukiorpassuanguulersuni naalakkersuinikkut eqqartorneqartuarpoq, aningaasat ilami aningaasarpasuit nunatsinni annerusumik kaaviiartinnagit sulisinnagillu nunatsinniit avammut aniatinnartakkatta qanoq iliornikkut nunatsinnut iluaqutaanerusumik aqqiivigineqarsinnaanerat.

Apeqquteqaat § 37 naapertorlugu nr. 2015-17-imut akissut najoqqutaralugu Namminersorlutik Oqartussat 2014-imi 32,5 mio. kr. sillimmasiinerumut atorsimavaat kiisalu ilanngullugu Namminersorlutik Oqartussat suliffeqarfiutaasa sillimmasernerinut, apeqquteqaat § 37 naapertorlugu nr. 2015-98-imut akissummit erserpoq ukioq taanna 34,9 mio. kr. atorreqarsimasut.

Kommuneni namminersortunilu aammalu inuit ataasiakkaat sillimmasiinerumut aningaasat minnerpaamik arlariinnik millionilikkaat tungaanut atorreqartartut ilimagineqarpoq, taamaamat kalaallit nunaata ukiumut sillimmasiinerumut atortagai 100 mio. kr.-it sinnersimassagai nalilerneqarsinnaavoq.

Partii Naleqqami isumaqarpugut sillimmasiisarfimmik Namminersorlutik Oqartussat pitaassagaluarpata aningaasaqarneq iluaquserneqassasoq, aningaasat nunatsinniit aniaannartussaagaluit uninngatiinnarneqarsinnaasut.

Partii Naleqqamiit ilisimavarput, paasisinnaalluarlugulu illoqarfinni assigiinngitsuni sillimmasiisarfiit avataaneersut immikkoortortaqarfiliorsimasut, – minnerunngitsumik Namminersorlutik Oqartussat aammalu Namminersorlutik Oqartussat suliffeqarfiutaasa sillimmasiinermut ukiut tamaasa aningaasat atortagaat eqqarsaatigalugit.

Partii Naleqqami qularutiginnilarput sillimmasiisarfimmik Namminersorlutik Oqartussat pigisaannik pilersitsineq kalaallinut inuiannut iluaqutaasinnaasoq, aammalu nunap aningaasaqarneranut.

Taamaammat siunnersuutigarpugut Naalakkersuisut peqquneqassasut qulaani misissuisitsineq taaneqartoq ingerlatissagaat, tunngavissaqarluartumik oqallinnissaq pillugu aammalu neriunartumik sillimmasiisarfimmik pilersitsisoqarnissaa aalajangiiffigineqarsinnaalerumaartoq.

**Pisortatigut aningaasatigut allaffissornikkullu kingunissai:**

Misissuititsinermut pisortatigut aningaasartuutissat nalilerneqarpugut 125-250.000 kr. missiliussagai, tassa sulisorineqartussap  $\frac{1}{4}$  -miit  $\frac{1}{2}$ -imut ukiumut nalinga. Naalakkersuisut allamik isumaqassagaluarpata tamanna naalakkersuisunit suliap siullermeerneqarnerani akissummi nassuiaateqarfigineqassasoq piumasarissavarput.

**Namminersortunut aningaasatigut allaffissornikkullu kingunissai:**

Soqanngilaq.

**Innuttaasunut aningaasatigut allaffissornikkullu kingunissai:**

Soqanngilaq.